

葉氏醫案存真

葉氏醫酉案

存真

後附馬案

標商局書堂頃干



昔者竊聞之孫真人以神鍼療龍神之疾神龍感之贈以禁方三十孫因著千金方三十卷每卷中雜一龍宮方今人亦不能一一指出何方為龍宮所授惟相傳六味丸即禁方之一試以此方論之山藥之甘地黃之苦丹皮之辛萸肉之酸澤瀉之鹹五味具備又以茯苓之淡調和之俾五臟六腑均受其益此其運用之妙誠不可思議哉由是知醫者之有方猶匠者之有斧斤繩墨非是無以成其事也吾鄉葉天士先生生在康熙初沒於乾隆十年工長桑之術身歷三朝名聞九域夫人而知之矣其謝世已九十餘年至今談方術者必舉其姓字以為仲景元化一流人也其生平所製方有萃錄成編者其元孫訥人等校而受梓問敘於予夫人祖宗一言一行無非彛訓所存凡為子孫者必多方表章之以寄其數典不忘之志況方書為活人要術可以調元贊化而消斯民夭札厲疾之災者乎即如龍宮禁方非孫氏傳之世人又烏從而知之諺云施藥不如施方訥人兄弟斯刻不特表揚先澤亦有合乎昔賢善與人同之義又可緩乎哉是為敘

道光丙申七月舊史氏石韞玉撰

精氣神為人身之至寶醫能保人所寶則醫書真寶書也軒岐而下惟仲景稱聖為製方之祖嗣後英賢輩出各抒心得立法以啟後人方書充棟後之用法者能得古人法中之意而不泥於法則因病定方不執方以治病可也所難者在認症耳昔嘉言喻氏謂醫不難於用藥而難於認症故先議病後議藥丹溪朱氏著脈因證治一書亦以認症為先施治為後若但執某方治某病而至於何脈何因何症辨之不真焉能用之無誤寒熱虛實疑似甚多見病治病十無一效曷足怪哉吳中精於醫者代不乏人自葉香巖先生治稱神術百餘年來無有繼其傳者惜其生平濟人事殷無暇著述如臨症指南一書為門人所採輯久已風行海內今復見醫案存真三卷係其哲嗣訥人先生彙集家藏方案成編觀其施治之妙實由辨症之的其不惑於症之疑似治之不違於法而又不泥於法者苟非根柢內經博涉諸家其烏能洞徹陰陽標本隨症立方神明於規矩若是哉至馬祁王三家醫案各抒精義製方附刊於後亦足資後人採擇此書誠可寶也書既成先生濟世之業與其哲嗣濟世之心竝傳不朽而流澤孔長矣是為序

道光丙申秋九月吳郡胡國英識

凡例

- 一醫案皆係葉氏真本非若臨症指南間有雜湊及門方案轉令魚目混珠
- 一方案不分門類仍沿昔日抄本之舊閱者當分別觀之
- 一古人用藥本無一定分兩隨症輕重用之方中有載入分兩者亦仍其舊
- 一用藥有用別名者如申姜之類申姜疑即猴薑不易妄敢以俟博雅參攷
- 一載某府某人及年歲大小係當時門診及門所錄今悉照原本刊刻
- 一研六齋藏本後有馬元儀方案及祁王明王晉三數案不敢沒美附刊於後
- 一醫案抄本向有圈點今不刻圈點者讀其文知其義明眼人自能辨之
- 一家藏復有女科數卷現在編校未成容俟續出

自序

先高祖臨症指南一書為錫山華君岫雲所刻書成於乾隆丙戌風行海內余成童時涉獵及之不能識也後檢故紙得家藏方案一冊魯魚亥豕所在多有謬謂此必指南選刻所遺者亦憊置未暇究近年留心斯道因發篋讀之然後知先哲之所以享重名者久而彌光蓋自有在嘉慶丙子獲見天元醫案於研六齋周謝庵姨丈家精光騰躍歎為希世之寶道光辛卯於城東陳順庵家復見方案摘錄百十條簡潔高妙洵為門診之精華又不勝遺珠之歎因思華君居非同里又素不業醫能以數年採輯之勤沾丐後人厥功甚偉余為裔孫獨珍手澤而不公諸當世華君有知其謂我何但指南類症分編余則一無去取亦不分門別類自愧識淺不敢妄為選擇姑還舊觀且自來醫家臨證雖多豈能盡備而茲又篇帙無多乎其天元醫案中載馬元儀先生案頗多皆神妙與先祖方案如駢之靳另附於後自為一卷而祁正明王晉三兩先生之案亦附焉世有好學深思者或再搜採選刻則其功當不在華君下矣其拭目以俟之

道光十二年歲在壬辰四月元孫萬青謹序

通下下通脫中仍結上下格拒者乃上熱下寒古人用麻沸湯煮涼藥以解上濃煎溫補以治下使陽氣不脫鬱熱自罷今倣之

黃芩 小川連 枳實 右三味入滾水中煮五十沸即濾

人參 淡附子 乾薑 上三味煎濃汁一盃和入前藥服

疝攻上觸必傾囊嘔物此胃中得食氣壅肝邪無以洩越得吐而解蓋木鬱達之也此番病發原自怒起其為肝厥何疑

炒黑川椒 炒小茴香 川楝子 橘核 青皮汁 青木香

虛損心熱齟乾咳嗽失血此天氣令降身中龍相反升下焦真氣不得收納故也惟寧神靜坐斯天君不動自得陰上承陽下降地天交而成泰矣

紫胡桃肉 坎炁 糯稻根鬚 北五味子 白蜜

今年七月秋暑未除初病頭痛身熱是暑由上竅傷及清陽醫藥當辛涼取氣同氣相求中上之輕邪自散無如辛溫苦寒清滋之類雜然竝投水穀內蒸氤氳不解見症仍在身半以上軀殼之間非關臟腑大病第能蔬食十日可解上焦之鬱

川芎 薄荷 荊芥炭 炒白芷 蔓荊子 菊花蒂 元茶 煎湯代水

精傷痿躄尻髀跗脛皆如槁木不知冷熱糞黑腸枯用潤劑通陰中之陽病人自覺熱從內起畧有活動但係沉痼之病未許其能却疾也

鹿茸 當歸 枸杞子 熟地 虎骨膠 舶茴香 沙蒺藜 牛膝

脈濇小數質弱平昔喜飲酒性先入肝膽故易生嗔怒且淫火侍親煩勞鬱熱自情懷而升病屬鬱勞惟怡悅為上用藥不易奏功

桑葉 川貝母 粉丹皮 山梔殼 天花粉 蜜炒廣皮

胃主納脾主運能食不化泄瀉治在太陰脾臟此臟為柔臟陽動則能運凡陰藥取味皆靜歸地之屬反助病矣

淡附子 淡乾薑 生益智 生砂仁 人參 茯苓

脈弦舌白吐涎食入膈上即湧出自述由動怒得之春病至霜降不愈心中反痛以肝病犯胃治法

金鈴子 延胡索 良薑 茯苓 炒半夏 砂仁殼

形壯色白氣虛有痰痰阻經絡氣血不通經事三年不來古人治此必以調氣為先蓋氣為血帥也見病治病終亦無裨

生白朮 茯苓塊 香附 砂仁 蒺藜 製半夏 淡水熬膏臨好以文火燉收清

晨開水調服

孕育已十一胎未到七七夭癸已絕八脈不司約束脊腰痠痛足跗骨中麻痺問有帶淋畏熱此屬陰虛虎潛法治之

熟地 龜版 虎骨膠 知母 當歸 白芍 黃柏 牛膝

虛損真陰內涸當戊己君火主令立夏小滿陽氣交併於上喉舌腫腐是陰不上承薰蒸膩涎吐咯不清皆五液之變由司氣感及軀質而然檢古方以仲景少陰咽痛例用猪膚湯

用白虎法渴煩少減畧饑必形神奕倦津液既遭熱迫陽明脈絡自怯當以清燥法清氣熱以涵液

人參 麥冬 知母 石膏 生地 阿膠 甘草

三日瘧是邪干陰經表散和解不能去病詢知不慎口腹食物之氣亦能助邪宜先理脾胃而廓清之

桂枝木 生薑甲 烏梅肉 常山 廣皮 知母 草果 淡黃芩

心悸如饑頭暈肢麻此乃內起肝風汗多淋漓氣弱陽洩近日肌浮腹大木傳土也做丹溪養金制木使脾少賊邪之害

阿膠 天冬 生白芍 細生地 麥冬 明天麻 菊花炭

痘後四肢瘍毒延綿日久聚集環跳膝跗以致不能行走乃沉痾難愈之疾據述筋粗強

硬不司舒展內經病能篇筋縱筋弛分寒濕濕熱之異但痘漿未化之毒混處血脈絡間
兩年之久攻之決不應病夫四肢血少氣多初患當取陽明今已流入陰分遇風冷輒痛
溫通逐邪理亦可通然男子未通精之歲必以生陰為要務調理方法宗錢仲陽麋茸六
味壯陰通陽可以常進

麋茸 大熟地 紅花 當歸 枸杞子 杜仲粉 虎脛骨 牛膝

二十日來以甘溫益氣養陰治脾胃衛後天漸得知饑納食思瘡痢致傷下焦奇經八
脈皆損是以倏起寒熱背部畏冷遇風必嗽痰陽維脈無以維持護衛衛疎則汗泄矣從
虛損門治

人參 鹿角霜 沙蒺藜 補骨脂 茯神 枸杞炭 鹿茸 當歸身

少腹癢聚從左上升每月事將至經絡腹脇先痛自述嗔怒病加病在肝俞血海由氣逆
血滯故年逾三旬未得孕育下焦時冷治當理氣血以調經若縷治病樣未免太拙

當歸 川芎 木香 麝香 香附 桃仁 查肉 葱白 延胡索 吳茱萸

川棟子 小茴香 韭白 水泛為丸益母草湯送

悲憂哭泣致病不饑欲嘔病屬鬱症治當條達肝胃第胃為陽土肝寄相火雖結癥氣燥
熱未宜

製半夏 白茯苓 炒丹皮 炒神麴 吳茱萸 夏枯草 黑山梔 川連

因噴怒心胸痞脹三年左脇下堅疑有形偶觸勞忿則寒熱無汗此屬鬱痺氣血延成肥氣治當宣通營衛流行脈絡佐入攻堅俾寒熱得止再議

炒柴胡 生香附 半夏麴 丹皮 桃仁 青皮 薑汁炒梔仁 生牡蠣
臨服入鱉血五匙

行走多動陽酒濕多變熱熱氣上升犯冒清竅頭蒙睖脹衄血成流上齟腐瘍久必漏卮世俗通套每用犀角地黃然酒性先入膽次及胃酒客性惡甜膩從苦降定議以苦能却濕也

桑葉 苦丁茶 連翹心 荷葉邊 丹皮 射干

瘡傷真陰七八年來每交春季即脊背肩脾脹痛入夏更甚冬寒乃瘡凡春夏之時天地大氣發泄至秋冬方始斂藏臟真既少升洩病來督脈行身之背自陰而及於陽但內傷不復未易見功惟養靜斷慾用藥可希漸效

鹿角霜 鹿角膠 熟地炭 兔絲餅 青鹽 柏子仁

暑濕乃夏秋時令之病其邪先着氣分氤氲蒙昧有形無質醫投攻奪乃有形治法氣傷陽損至今肢冷溏泄何一非陽微腫脹之徵此宜溫補下中莫治眼前

人參 白朮 木瓜 淡附子 益智仁 炒廣皮 厚樸

高年少腹氣衝脘下心肋時痛舌底流涎得甜味或靜卧少寢知饑不食大小便日窒此

皆陰液內枯陽氣結閉喻西昌有滋液救焚之議然衰老關格病苟延歲月而已醫藥僅堪圖倖

大麻仁 柏子仁 枸杞子 肉苁蓉 紫石英 炒牛膝

三陰瘡是陰分伏邪汗之清之不解但與膩滯補藥和無出路遂致吐衄寒自背起督脈應乎太陽

川桂枝 熟半夏 炒白芍 炒黑蜀漆 生牡蠣

淮海水鹹土潮水土異氣自口鼻受入必聚募原濕邪久鬱化熱陽明絡損血溢咳嗽視目黃面亮顯然濕熱變痰況病已數年若是陰虛必不能延久至今也從濕熱例治

杏仁 厚樸 米仁 赤茯苓 塊滑石 綿茵陳

淋屬肝膽而酒性濕熱之氣肝膽先受滓汁次及腸胃濕甚熱鬱溺竅悉阻莖管窄溢久病積熱愈深不受溫補當忌酒肉厚味分利雖投不能却病從經義苦味祛濕參以解毒

料豆皮 牡丹皮 黑山梔 蘆薈 龍胆草 真青黛 金銀花 胡黃連

陰虛汗泄精遺理應固攝但先哲濇固之藥必佐通滑以引導濇味醫知斯理者鮮矣

熟地 萸肉 杜芡實 五味子 龍骨 遠志 茯神 用猪脊髓金櫻子膏搗和

為丸

幼稚驚癇至十三歲患發每發必於子夜陽動之時想陰未充溢肝風乘陽冒亂神識痰

涎上湧治痰清火無效蓋肝為腎子木中陰火燭灼腎液皆為上泛矣女子天癸得來斯病當有愈期

大熟地 懷山藥 當歸身 茯苓塊 山萸肉 紫石英 丹皮 澤瀉 河車膠 便濁精濁兩者迥殊據述素有夢遺濁發遺止則知精濁矣分清飲八正散治濁套藥與此無涉當固補下焦不必分利

熟地 遠志 沙蒺藜 線魚膠 山萸肉 覆盆子 兔絲餅 生龍骨 茯苓塊 臭穢觸入游行中道募原先受分布三焦上下頭脹脛悶洞泄以芳香逐穢法

藿香梗 生香附 茯苓皮 白豆蔻 飛滑石 炒厚樸 新會皮 食下脘中噎阻背脇氣逆而痛脈右寸獨大據述由嗔怒致病當與清金制木形瘦津少勿用破烝燥血

枇杷葉 桔梗 紫降香汁 川貝 蘇子 生香附汁

凡憂愁思慮之內傷不足必先上損心肺心主營肺主衛二氣既虧不耐煩勞易於受邪惟養正則邪自除無麻桂大劫散之理故內傷必取法乎東垣今血止脈奕形倦不食仍噎咳不已吐痰若粘涎皆土敗金枯之象急與甘緩補法

生黃芪 炒白芍 炙草 飴糖 南棗

著左卧即效甚是臟陰血液傷極用益氣甘藥者緣有形生於無形耳

人參 黃芪 當歸 白芍 南棗 炙草

寒熱因經水不來而甚此內經謂二陽之病發心脾女子不月肌肉日瘦腹有動氣即風消息責矣內損成勞非通經逐瘀所能愈也

柏子仁 歸身 白芍 桂枝 桂圓肉 生黃芪

今年二三月久雨陰晦入山行走必有瘴氣濕邪著於脾胃腹中脹閉溏瀉挾積溺赤不爽目皆肌肉悉黃夫濕為陰邪鬱久必熱熱自濕中而出當以濕為本治

生茅朮 炒厚樸 猪苓 草豆蔻 新會皮 綿茵陳 澤瀉 茯苓皮

木香汁磨入

精血五液哀奪陽化內風上巔則眩暈欲厥乘絡則四末痠痺老年有此斷非攻邪可却古方侯氏黑散取乎培實孔竅者緣此

熟地 杞子 藕汁 河車膠 紫石英 甘菊炭 茯苓 人乳粉 熬膏下用蜜

色蒼肉瘦形象尖長木火之質陰液最難充旺春間欬嗽雖係風溫外邪但既屬陰虧冬藏先已不固因欬逆震動浮陽上冒清空自阻用藥宜取沈靜質重填陰鎮陽方是開方辛氣居半與磁石相阻從容陰中之陽亦非收攝不效宜矣

大熟地 靈磁石 萸肉 五味子 牡丹皮 雲茯苓 阿膠 懷山藥 澤瀉

龜版

東垣謂瘧痢皆令脾傷以為寒為熱之邪由四末蒸犯中焦也蓋頭形象天清陽不曠故面目諸竅不和形寒汗泄將來浮腫腹大已了然在目矣

人參 茯苓 熟附子 淡乾薑 厚樸 澤瀉

脈弦緩面目肌膚皆黃舌白滑賦胸脘膈間脹閉病名濕溫由滌海潮濕氣入口鼻至募原分布三焦此為外因仍食水穀腥物與外入穢濁之邪兩相交混濕甚熱鬱三焦隧道氣血不通遂變黃色發汗不愈者濕家本有汗也清熱消導不愈者熱從濕中而起濕不去則熱不除也夫濕邪無形質攻滯乃有形治法其不效宜矣昔河間治濕熱必取乎苦辛氣寒蓋苦降以逐濕辛香以祛穢寒取乎氣藉氣行不閉寒於內也當世醫者混以傷寒表裏為治殊不知穢濕氣入口鼻游行三焦不與傷寒同治

綿茵陳 白豆蔻 厚樸 川通草 廣皮白炒 茯苓皮 半夏麴 塊滑石

濕濁內蒸癰熱發黃三焦壅遏濁氣迷漫又非有形質滯此辛香逐穢宣通是一定法日期既多恐濁閉神昏另以銀花湯化至寶丹二粒

綿茵陳 白豆蔻 茯苓皮 厚樸 草果 滑石 杏仁 木通 鮮菖蒲根汁

復診

綿茵陳 厚樸 江枳實 草果仁 細木通 黑山梔 雲茯苓 黃柏

痰滯得穢濁膠結濕中熱起蒸變發黃脘中痞悶病在氣分兩進消導理氣面目黃色畧

減而痞結如故議與治疸疎滯兼以蘇合香丸逐穢為法

茵陳 草果仁 枳實 厚樸 廣皮 木通

暮服蘇合香丸一九三服

復診

生白朮 茯苓塊 茵陳 猪苓 厚樸 滑石 澤瀉

穉年瀉血是飲食不調熱蒸於絡為腸胃之病疳疔亦由濕熱內蒸而致熱甚則陰液不充風熱上升故乾噎法當與甘寒之劑俾金水同出一源況肺熱必移大腸腎開竅於二陰也

鮮生地 地骨皮 麥門冬 金銀花 稽豆皮 肥知母

下利皆令傷陰值冲年情念正萌遂患夢遺勞煩饑餒更甚以精血有形必從水穀入胃資其生長也診脈數面亮莖舉則精出溺後亦淋瀝是陰虛精竅不固因陽氣下墜所致議固下陰以和陽

熟地 旱蓮草 生龍骨 懷山藥 杜芡實 萸肉 雲茯苓 蓮蕊鬚

金櫻子膏 煉蜜為丸

瘡後耳竅流膿是竅閉失聰留邪與氣血混為扭結七八年之久清散不能速效當忌葷酒濁味卧時服茶調散一錢患耳中以甘遂削尖插入耳內銜甘草半寸許兩年前晨泄